

憲宗大王實錄

卷之三

亥巳

0230296
no.3



230296 國立臺灣大學圖書館典藏
冊7.10.10 由國家圖書館數位化

憲宗經文緯武明仁哲孝大王實錄卷之六

五年

備道先十九年

正月戊戌大王大妃寶齡望六上詣仁政殿親上表襲箋文頌教

受賀赦○教曰今年稱賀與昨年尤異雖因東朝撝謙之德未能備禮識喜予

小子頌祝之忱豈可無廣慶之道貢人舊遺在三千石市民徭役限一朔洋人

懸房贖限十日諸道舊還限十萬石並蕩減事令廟堂行會○巳亥陳賀時宣

教官副司果李源庚左通禮柳榮輔右通禮權大肯並加資○以金英淳為成

均館大司成趙元錫為慶尚右道兵馬節度使○庚子○辛丑○壬寅日暈兩

珥○癸卯以洪命周為兵曹判書李翊會為司憲府大司憲李正耆為司諫院

大司諫○甲辰○乙巳給慶州府燒戶及利原縣滄戶恤典○丙午點下別歲

抄○丁未上御熙政堂引見大臣備局堂上大王大妃教曰今年孝廟禮陟舊

甲也遣大臣攝行酌獻禮于寧陵宋文正大老祠一體致侑右議政李止淵啓

言獎拔循良自漢已然而我朝三班中文武兩歧自有進用之法惟蔭官則捨

善治陞秩之外更無他路且勲堂乏人今此請資諸人俱是勲臣嫡長亦合於

他日襲封之階梯前牧使朴齊尚趙咸永驪州牧使李賢耆並加通政似好故

敢達矣大王大妃從之○戊申以李濟完為慶尚左道兵馬節度使○己酉大

王大妃教曰日前次對臺臣以賑恤事為言矣雖以補賑言之有穀之人出自善心不計幾何拯濟飢民則此嘉尚之事朝廷固當隨所聞特為收錄如其不然而無端侵責至使不堪此專由於守令及吏鄉輩憑藉侵饒計也勸分本意豈有如是之理以此意廟堂各別措辭開飭於設賑各道道守臣○庚戌○辛亥○壬子京各司各營進戊戌會計簿

戶曹納廉惠一兵曹訓局禁營御營總
銀子二十萬五千一百二十一兩九錢一分零錢文三十二萬九千九百四十四兩二錢五分
又零布八十八石八斗八升零田米一千一百五十九石二斗三升零太一
六千六百九十八石八斗八升零田米一千一百五十九石二斗三升零太一
三萬五千一百九十六石五斗五升零皮雜穀○癸丑○甲寅○乙卯○丙辰○丁巳

給珍島郡滄戶恤典○戊午召對于熙政堂○先是裁判倭以關白承襲島主還島島主子代察事來請渡海之行及渡海官之入去也島主尚未還而徑行相接等諸凡宴禮東萊府使論任譚輩顛錯之罪修啟到京則渡海官之兄李宜教誘訓導朴命澈之子從中還送啟本謀所以改措語緩其罪事覺令王府嚴覈命澈兄命浚與宜教實綱繆其事並首實判金吾據律有不分首從之文請並置命浚宜教于大辟諸大臣以首從之無有卞別疑之請傳輕之大王大妃教曰此輩眼無國家罪犯至此有何差重差輕之別乎惟當並用一律而諸

大臣之議雖與予意有異而不得不勉從之遂命命浚宜教遠惡島決配命澈
下送萊府聲其罪嚴刑後邈遠定配○已未進講于熙政堂○判義禁金履載
䟽曰象譯兩囚竟皆自服謹奉成命議律於諸大臣則大臣獻議以兩囚之不
分首從曰大非獄體又曰此案不可無首從均罪則失出也同律則失入也夫
是獄臣實按之按獄而失獄體則不職也失出而失入則重犯也縱大僚忠厚
只論其失不請其罪臣心慚懼實無所容措惟俟鈇鉞之誅乞仰稟東朝亟遞
臣職仍治臣罪夫刑法者王者之所慎重也立條著文較若畫一而後之遵用
者猶或有得失况一有異說叅行於其間則轉益疑眩差毫謬千將至於刑罰
不中豈不大可憂哉臣之前日議啓曰稽之法文有分首從者亦有不分首從
者於其可分處不分與其不可分處強分俱非廷尉平之議者非臣臆說即據
法文中分與不分有兩條而言者也蓋犯罪者不止一人則多人共犯之中必
有情跡彼此之殊罪犯輕重之差則不可無首從之分而首從首律從從減論
此固聖王欽恤之意故著于法文分首從者居多如鬪毆殺傷偽造以下數百
條不可悉數者是也亦或有情跡無彼此之殊罪犯無輕重之差則無以別其
首從而律亦同勘如謀反逆謀叛造妖書妖言盜制書事干軍機錢糧盜內府

財物強盜得財之類若干條是也故法文中別立不分首從之一科是亦不可無者也今見獻議有曰獄不可無首從又曰有獄而無首從非獄體也然則法文中不分首從一條可刪去也刪去此條則如反叛盜劫同謀共犯者雖有數十百人誅止首惡則餘皆減免如此則何以懲暴而防亂乎大可憂者一也又曰律文中斬絞諸條不分首從者即首從並用本律之謂也非謂罪之首從初不分也若然則何不使人易知云首與從皆斬絞而必曰不分首從乎且既分首從而並用本律則法文中為從者減等之文可刊改也刊改此文則如鬪毆殺傷偽造之有首有從者雖至數十百人首與從皆不得免戮也如此則人何以得保其生乎大可憂者二也獻議又曰此獄事情未嘗無主客之勢又曰圖改啓語其果為誰地乎事有本末計有主客今以主客為言而曰勢曰計者可見其指屬之有在蓋彼兩囚一則漢譯一則倭譯而渡海講定等事倭譯之任故論以主客之勢指以任事之計此則意推摸索之言而若臣則無他聞見只以其面質口招得其情實改啓之相與問答一心綢繆還啓之共為指揮一辭翰欵則情跡既同罪犯惟均實無輕重之可言故遂援律文中不分首從之條以為奏當苟有失當廟啓臺評改其官而更其訊讞亦豈不明白嚴正而今則

不然乃於罪囚皆服當律磨鍊之議另有附陳徒以囚供以外意推摸索之言然疑於貍稽審覈真的已成之獄如是則自古治刑獄置對受辭之法可廢棄也此而廢棄則其將獄無完案刑無定律出入惟憑於聽聞輕重多在於傳會有犯而或違非辜而亦罹民何所措其手足乎大可憂者三也噫彼么麼象譯之類縱恣姦譎共犯罔赦之罪臣謂無有彼此並置重辟則可以益嚴於懲奸戢惡矣大綱既正則如為首為從之差等分介猶屬細故今此附陳之費辭惓惓者多在於是則非臣愚淺所敢知也但念有獄必有首從雖有首從而並用本律似未盡合於律文本旨則誠不無斷獄疑眩之憂故不揆僭妄略此數陳以備後來議識者參考辨正無為錯誤之地則其於刑政或不無少補焉耳批曰凡有刑政各陳其意誠好矣今此所言太涉自是豈不念事體而然乎○庚申進講于熙政堂○領府事李相璜判府事朴宗薰聯劄自列略曰臣等於病伏昏眊之中伏承譯囚獻議之命只就律文之稍相近處叅以獄體之所當然者略貢愚見及伏覩慈殿判下始知微見之疎舛荒謬有失竅要深切悚慙際有前判金吾自引之章推說張皇下語深峻不審諸議有甚揆着於此判堂而盛言至此乎蓋其承命按獄首尾決旬宜其貍稽閱實反復鈎詰竟取輸服靡

有遺蘊而忽有傍人勦論若相逕庭故未免有所拂觸於先入自是之見而然耳然因供例多詭詐法律本自精微苟欲據彼而斷此則人見之或相參差其勢固然此所以必貴廣詢而取正也若必苟循而雷同則又安用詢議為哉府讞亦固曰獄有分首從者有不分首從者云爾而臣等之言即其所云分首從者也金吾之言即所云不分首從者也可否之間法理自在若曰不分首從之律文諸條必皆刪改然後乃可以用首從之律則毋乃太牽強而甚率爾乎有案則有首從有犯則有主客即獄體之常也而若其罪犯至重大並與為從者皆合用辟則斯有首從同律之若干條兩不相妨一按可辨此重臣豈真不識此而有此言耶臣等既忝大官議此一小獄義當剖析乎律令之所難決提掇乎法官之所不及有以仰禪刑政之萬一而乃反輓法橫議以啓日後無窮之弊若將使象魏失懸鼎鑄無徵如所云三可憂者此其辜負當服何典懣懣危慄若無所容茲敢相率自列恭俟嚴命乞稟東朝亟降處分以為妄議者戒焉

○辛酉進講于熙政堂○右議政李止淵送出城外上遣史官敦召之止淵附奏曰今番倭譯事始起查端者即臣也終定律名者亦臣也禁堂疏中雖不節摘臣獻議句語而一篇旨意全屬臣身其曰異說叅行至於刑罰不中其曰意

推摸索然疑已成之獄其曰並置重辟可以懲奸戢惡云者反覆憂歎深密峻截苟究其罪非臣而誰謬淺之見曾未見重辜負之跡終至莫掩而臣之尤所自悼者名以大官事關刑辟而不能剖析律理未免傳會輕重致使大綱不正斷獄眩錯上以累生道殺人之政下以犯徇私玩法之科此臣所以慙慙慄慄無面可顯泥首荒濱恭俟鈇鉞者也官職去訖更無可論惟願適被誅罰尋因上屢諭大王大妃嚴教復就職○以金教根為禮曹判書徐耕輔為工曹判書○賑賑以發賣初巡畢給啓○壬戌進講于熙政堂○召對于熙政堂○大王大妃教曰今番兩譯微事雖已究竟前判金吾上疏自是已見已非義事朝廷之上莫重者事體則遣辭太不審慎致有當國大臣蒼黃迸出之舉由前由後所失甚大豈可以耆社崇品曲為容恕乎前判義禁金履載畿沿定配○癸亥進講于熙政堂○大王大妃教曰大臣既已還第而以禁堂處分似為難安前判義禁金履載罪名分揀以安大臣之心○甲子進講于熙政堂○乙丑進講于熙政堂○設人日製于泮宮○丙寅上詣仁政殿親傳文廟釋奠香祝○二月丁卯日有食之食在地下○上詣仁政殿親傳社稷春享香祝○戊辰召見全羅監司李穆淵于熙政堂辭陞也○己巳進講于熙政堂○以金道喜為刑

曹判書具載哲為全羅左道水軍節度使○庚午進講于熙政堂○以朴齊明為司諫院大司諫○辛未進講于熙政堂○壬申進講于熙政堂○癸酉上詣仁政殿親傳景慕宮春享香祝○甲戌給覓津府滄戶恤典○乙亥○丙子上御熙政堂引見大臣備局堂上及咸鏡監司金炳朝炳朝辭陛也○丁丑進講于熙政堂○戊寅進講于熙政堂○己卯進講于熙政堂○庚辰進講于熙政堂○辛巳進講于熙政堂○召見奉審大臣朴宗薰于熙政堂寧陵酌獻禮英陵奉審後入來也○壬午進講于熙政堂○癸未寧陵酌獻禮獻官以下施賞有差大祝司僕正金輔根加資○甲申上詣太廟景慕宮景祐宮展拜春謁也○成均館啓言臣聞居齋儒生等今日朝食堂不為設行馳往泮宮招問捲堂之由則諸生等書進所懷以為臣等伏見日前政目新除惠陵叅奉尹敬圭即斯文亂賊光顏之子也噫彼光顏昔按嶺節有英陽雲谷書院毀撤之事是院即朱夫子與先正臣宋時烈兩賢真容屢揭之所苟有一分人心於兩賢道德孰不欽仰尊崇而光顏之毀析祠宇撤去影幘抑獨何心哉如非賊鑄凶徒辛壬醜孽何敢如是無嚴之極士林之聲討峻發朝家之處分嚴截勘以重律投諸遠裔終身不復廁朝籍之間當時國是大定而至今士論猶鬱不可以其身

已死其事已往而有所參怒於其子也不意銓官不顧公議肆然薦注有若舊德世蔭之循例差擬者然臣等相顧愕眙繼以憂歎噫今年是何年也聖上起感於寧陵魚水之契特舉大老祠致侑之禮凡在瞻聆莫不欽誦而乃以醜正遺種無難舉擬於此時意則黨私計實嘗試若此不已則豈甲子孫亦將接踵而起侮聖蔑賢之徒無復顧忌羸豕躑躅履霜堅冰寧不寒心哉往在純廟戊辰諸儒生以光顏事捲堂上所懷聖批若曰如有秉彛之心豈至於此屏諸四裔不齒人類宜矣大哉王言炳如日星凜若霜雪人類不齒之餘孽何可濫通仕籍並列衿紳乎臣等慨義理之寢晦痛隄防之漸壞宜即齊聲張討而人甲天高無路陳籲以此情踪何敢晏然入堂云矣聖廟捲堂事體至重即為還入之意多般開諭諸生終不回聽何以為之教曰此事可付之朝廷公議似非諸生如是之事即為曉諭使之還入○乙酉○丙戌吏曹判書鄭元容疏辭本職略曰人臣之罪黨私為大政官之失背公最重今臣之遭罹竒恠乃至於此乎臣伏見太學諸生聲討臣論斥臣者曰不顧公議曰意則黨私噫嘻何其甚也夫太學士論之為人所憚以其論之合道理而厭衆心也今諸生捲豆簞撤絃誦深夜抱書仰瀆聰聽有若義理關楬之係呼吸者然苟問其罪臣實其人

士論之來何可不恤而但未知今世之尊賢衛道游談義理之類必十百其倍於居齋諸生之數而識見議論一如諸生之言乎然則是所謂大同之公議臣雖昏懦亦安得自是哉非惟縫掖青衿之言上自搢紳大夫下至委巷小人一辭皆以臣謂不顧公議之人則臣固已見棄於世得罪於朝何勞諸生之抱憂長歎乎且居銓循私之習不問其人之賢否牽連細瑣市恩結援則是可謂負隆眦而淆選方揆諸朝典罪不容貸然臣稔聞尹敬圭劬經飭躬一鄉稱善職掌薦注實合甄錄黨與不黨非所敢云今諸生之相顧愕眙者非以敬圭之為不賢也特以其父有撤院之罪而宜施延嗣之罰也撤院苟由於侮聖蔑賢則行儒言儒者將羣起而攻之奚獨泮宮之士哉方其事發之初儒童遽上則惟我純廟聖心驚惕至下若有秉彛豈至於此之教及其故重臣爰辭出上下始知此院之為私設而屢撤之由朝令也其時廟堂奏啓以為設院既是朝禁毀撤不必為罪但以移奉之際有欠儀節配謫而止其後特宥蕩滌叙授其牒又因儒言聖教以黨習嚴責之批旨有若曰故重臣及曹錫倫事年久之後豈可不揜擬乎至于庚辰辭教嚴重至今揭板常目前後恩言昭晰無餘全保世家糜爾爵祿之聖念至渥與天同大孰不欽仰此皆臣耳目所覩記也故重臣之

所蒙被於昔日者已如此况今其子之補筮一命更有何疑難乎今其書又以今年此時之舉擬添為臣罪此尤臣未可曉者也苟其人之可廢常年與今年何異苟其人之不可廢此時與他時奚間惟可論其人之有累與否豈可隨年而為輕重哉至若嘗試二字儒生之論又何容易至此臆度陳告先輩攸戒臣何必與之曰然曰否重傷事面也哉抑臣又有自悼者臣立朝久矣致位崇矣平素言行不能推重於當世因一蔭塗之末注人之為言非理相加譏刺凌躡無所顧藉臣以何顏對選部之吏而被夾袋之錄乎乞鑄臣職仍治臣罪批曰是非之際宜欲一伸所請依施○以金道喜為慶尚道觀察使趙秉鉉為刑曹判書趙寅永為吏曹判書○丁亥進講于熙政堂○中批以李紀淵為戶曹判書○戊子○己丑○庚寅掌令李魯確疏略曰臣見前吏判鄭元容疏本則憂憤所激不容泯默噫元容之疏出而世道之變可謂無不有矣義理漸晦隄防將壞首善之地乃有憂惋之言是言也即一世之言事關斯文諸生特先發之耳大哉聖教不以為不可若曰此事可付之朝廷公議苟有一分畏憚之心固宜屏息悔悚訟愆恭俟而今反沾沾自是揚揚自得閃忽其辭謂可以疑眩聽聽豪健其意莫掩乎藐蔑朝野殆若妖豎沾慧驕童倚勢謎藏跳踉謂莫人誰

何者然何所恃挾乃敢如是喚其沒覺無足深誅若又置而不數霜冰躡蹠之憂亦可畏也臣請以疏語略辨之其曰諸生之深夜抱書有若義理關捩噫此何言也從古義理關捩莫嚴於斯文是非斯文之變又莫如光顧撤院時事而賢關諸生寥寥仍喞則烏在其四百年培養之士氣乎哉其曰上自搢紳大夫下至委巷小人皆以臣謂不顧公議則何勞諸生之抱憂長歎噫此何言也彼果奔走於搢紳委巷之間面面質問夫孰有右其言而誦其心者乎臣知其必無是也彼之所云即不過同惡相濟甘心死黨者類耳此輩之識見議論固不可如諸生之言矣其曰尹敬圭劬經飭躬一鄉稱善諸生愕眙非以敬圭為不賢噫此何言也敬圭之居鄉善惡姑舍是藉如侮賢醜正之鑄昱甲饒國誣君之光恒億若子若孫庶解文字不至武斷亦可謂之世家遺裔補先蔭而縻爾爵乎胡其無嚴畏而沒倫脊至此極矣其曰其時廟啓但以移奉之際有欠儀節配謫而止噫此何言也夫嶺以南幾百俎豆之所果皆朝禁以外之設乎於此院而必毀乃已憑公逞毒吁亦惜矣然其所以移奉之舉則莫重莫大何等敬謹所謂有欠儀節者又何等恃巉心骨俱寒而今乃如薄物細故之輕輕說去有若尋常配謫止於薄勘巧言佞色之真不忍正視者也其曰特旨宥還蕩

滌其瑕又曰辭教嚴重揭板常目又曰前後恩言昭晰無餘噫嘻何其工於斷
取善於文飾謂人可欺罔覺其欺天之歸乎特有滌瑕造化之天而在下之公
議未嘗全奪揭板常目匪怒之教而泮長之請去亟賜嘉納何敢以耳目覩記
隱然藉重而况此事顛末尚在掌攷聖教至嚴則道臣不得曲遮相劄繼陳則
禁堂亦被重典截頭截尾要幻事實愛黨立幟為計雖急傳會絲綸罪將何居
至若恩言昭晰果如彼言則邇來十數年慕光顏如元容者何限居銓而未嘗
聞以敬圭之名敢爾舉似雖以元容言之行政不為不久初仕之差不為不多
稔聞敬圭之善若是其詳而乃於屢疏乞解之後始為檢注先於敬圭者未必
更賢於敬圭則常年今年此時他時之縷縷辨解其舌雖饒其跡自露諸生之
斥以嘗試實亦太怒之論矣臣又有未可曉者彼既自處以立朝久而致位崇
矣應亦粗有聞見薄解道理而謂投此疏朝廷將不出一口氣耶是小人之無
忌憚也知其不免於被斥而看作樹立名節大以為光華耶然則龍蛇無化赤
子之日矣豈不大可憂哉蓋其本則窺覘勢利趨東附西假作虛澹之態實懷
吮舐之心表疏裏刻言行每舛厚購同朝無官不掠及據選部則利之在不
顧廉恥如饒得食殘縣末官猶爭錙銖瑣姻切戚亦視緊漫除非酬德要將市

恩情形伎倆和盤托出於是乎倚毗之隆而未暇念及恩遇之渥而容易辜負舊識慨憤不圖至斯舉世唾罵彼何人斯纔過京察依樣乞遞外效克讓內實固寵觀其疏語豈或情願而先朝舊臣獨不知報今之義乎肺肝如見脾胃難定執此論之不過是患得失一箇哀憐之物而乃以招納滓穢收舉釁累自許高着昂然妄大鼓吻弄管噴噀誹訕血戰正論角勝國是此而不明示好惡過加優容則何以折奸徒之習解識者之惑哉臣謂前吏判鄭元容亟施竄配之典斷不可已矣批曰爾言近於誅心前吏判何至是耶朝廷倚毗嚮用之人論節太過極為非矣爾則遞差○辛卯○壬辰大王大妃教曰放逐罪人洪奭周放○癸巳以李亨在為全羅左道水軍節度使○甲午○乙未○丙申以金英淳為吏曹叅議宋冕載為司憲府大司憲尹致謙為司諫院大司諫金仁根成近默為掌令宋來熙為持平○三月丁酉大王大妃教曰今見畿伯狀啓朔寧郡一百四十餘戶一時燒燼人命雖不傷其驚慘無比宣傳官一人別定下送一邊摘奸一邊無使渙散期於安意莫接之意慰諭○戊戌○己亥○庚子○辛丑右議政李止淵以邪學事奏請窮覈從之○壬寅○癸卯命前左議政洪奭周蕩滌叙用○甲辰以金洛龍為司諫院大司諫○乙巳○丙午○丁未上

詣綏陵展拜親祭陵官以下施賞有差大王大妃頒表裏文綺于陪從文武諸臣及儀仗吏隸等以主上初謁禰寢也○戊申以金左根為成均館大司成○給咸安等邑燒戶恤典○己酉上御仁政殿設春到記講居首尹載善製述表居首任百秀並直赴殿試○庚戌命智陵參奉尹大淳拿勘咸鏡監司金炳朝重推大淳在家不參寒食祭享道臣只請罷職故也○辛亥○壬子○癸丑○甲寅以金履載為禮曹判書○乙卯上詣北苑行望拜禮仍試參班儒武○丙辰上御熙政堂引見大臣備局堂上及慶尚監司金道喜道喜辭陞也右議政李止淵曰列聖朝講規必日三經筵又有召對夜對臣嘗觀先朝雖動駕殿座之日少有餘暇必命講對殿下則少有事會輒命停之詩傳始講已為經歲未訖三卷以昨年言之停講之日反多於開講之日如此而何望長進乎上曰今日當為召對又即開講矣○召對于熙政堂○執義鄭琦和疏曰臣於日前伏觀慈聖殿下因大僚提奏以邪徒窮覈事慈教若曰如有行邪術之恠異物件亦為盤覈其所從來斬除之方孰要於是大抵就捕數非不多而終未得巨奸大慝其冊子之翻騰器物之造作是豈無知覺貧賤者所能自辦也必是妖孽奸魁之薄有才藝者萬里和應潛貿於燕行以一傳十以此滌彼此若到底窮

覈則窩有所據根有所結而如不能鈎摘勦蕩誅止其沒分數之若而輩則將何以殄滅無遺乎批曰此果不可不到底鋤治所陳好矣○丁巳○戊午召對于熙政堂○以徐相五為全羅右道水軍節度使○己未○庚申召見回還冬至三使臣于熙政堂○辛酉○壬戌○癸亥上詣春塘臺行瑞慈臺試射○甲子○乙丑○四月丙寅賑恤廳以三巡發賣西部九百九十八戶南部二千二百三十二戶北部一千七百七十七戶米七百十二石十四斗畢給啓○丁卯上詣永禧殿展謁仍詣儲慶宮毓祥宮延祐宮宣禧宮藏譜閣懿昭廟展拜○戊辰以金興根為吏曹叅判尹永培為慶尚右道兵馬節度使李明植為慶尚左道水軍節度使○戊辰○己巳○庚午畫講于熙政堂○辛未○壬申○癸酉○甲戌以徐有薰為奎章閣直閣南秉哲為待教○乙亥○丙子○丁丑誅邪學罪人李女權得仁等九人○戊寅上御春塘臺行三日製賦居首李玄緒直赴會試仍命給分人柳燾等九人並赴今番庭試會試○己卯○庚辰○辛巳○壬午畫講于熙政堂○癸未命驪州還餉未捧中流亡戶五千七百石零依江華已施例特為蕩減○以朴綺壽為工曹判書權敦仁為漢城府判尹○甲申畫講于熙政堂○乙酉上御春塘臺行慶科庭試文武科殿試文取金永

三茅十二人武取李祉秀等一百五十一人○丙戌以金景善為吏曹參議趙秉鉉為司憲府大司憲朴宗休為司諫院大司諫朴岐壽為刑曹判書○丁亥○戊子晝講于熙政堂○己丑晝講于熙政堂○庚寅上御熙政堂引見大臣備局堂上大王大妃教曰凡係民憂寧或忘諸但子是婦人素無知識故每欲訓導於主上而不可得矣大臣諸臣當以嘉言頻頻仰達則以主上聰明仁聖必聽從矣右議政李止淵曰臣等敢不殫竭輔導而大凡治不外乎學頻接臣僚交相勉勵然後情志流通智慮開發當此艱虞之會君德成就專係於此而開講輒有作輟臨筵亦無問難其在羣下願祝之地誠不勝憧憧矣大王大妃教曰大臣之言果切實矣主上方在冲年益盡責難之道期有就將之效予日望之○晝講于熙政堂○以李完植為左邊捕盜大將○辛卯上御仁政殿行庭試文武科放榜○咸鏡監司金炳朝卒于官以朴岐壽代之○壬辰上御熙政堂受文武新恩謝恩○以洪敬謨為刑曹判書○癸巳中批以閔永勳為司諫院大司諫○甲午○五月乙未以鄭元容為禮曹判書○丙申以徐箕淳為吏曹參判○丁酉○戊戌○己亥○庚子平安監司鄭基善卒于官以金蘭淳代之○辛丑○壬寅○癸卯○甲辰召見咸鏡監司朴岐壽于熙政堂辭陞也

○以李光正為江原道觀察使朴綺壽為奎章閣提學金興根為直提學○乙巳○丙午晝講于熙政堂○丁未○戊申○己酉○庚戌○辛亥晝講于熙政堂○壬子晝講于熙政堂○慶尚監司金道喜以比安縣定北面四月二十七
日暴風急兩飛雹大者如瓢小者如拳民家漂頽人畜淪死十里大坪便成赤地牟麥有根而無莖秧坂田種園菜無牙遺山上雜木枝葉盡落邱壑間堆積之雹三日不消龍宮東南五面醴泉縣內縣東兩面咸昌西北兩面義城北部等六面亦被雹各穀舉被打傷殆無餘存啓○癸丑○甲寅○乙卯○丙辰○丁巳○戊午○己未上御熙政堂引見大臣備局堂上及平安監司金蘭淳蘭淳辭陞也大王大妃教曰近來秋曹邪學之懲治何如云耶此類若不趁即除鋤則其滋蔓之慮不啻尋常豈可一時踈忽而如是稽緩乎右議政李止淵曰當初所聞不啻狼藉而飭令之後尚無被捉者此未必彼輩有所懲畏革心而然矣大王大妃教曰雖被捉當刑者尚不畏死其未捉之前能畏法自新何可必耶止淵曰在數十年前人心猶皆驚憤知有討邪之法矣今則不然視若尋常此最憂憫矣大王大妃教曰自家藏勿令搜奪之後捕校輩更無所捉者云豈有如許國體乎此非予之獨憂朝廷之所共深慮也未久安知朝廷士夫間

無浸深者乎大臣出去後招致捕將益加申飭可也止淵啓言即見前全羅監
司李憲球所奏則備陳本道舊災最多為耕民偏害之狀及各宮各營司屯土
收稅時京差貽弊之端有令廟堂稟處之命矣今若就僞頃處一一查出還實
則所謂舊陳不期正而自正令道臣量其難易便否另飭守宰俾即舉行京差
之為小民切瘼誠如所奏收稅時凡執摠多寡作錢高低必皆關由於本官冬
宮各營司亦無得執言葛藤則庶可為顧畏自戢而在京差不至失利在屯民
足得息肩請令道臣依此成節目揭置於各邑屯所以為永久遵行此兩弊非
獨本道為然一體知委於諸道期有為民祛弊之實效從之○畫講于熙政堂
○以李嘉愚為漢城府判尹○庚申○辛酉○壬戌○癸亥○甲子○六月乙
丑命崇祭不卜日設行以久雨也○丙寅○丁卯○戊辰京畿畢賑狀啓坡州
等公賑十六邑饑民二十四萬四千九百六口仁川等救急十五邑鎮饑民五
萬四千八百四十二口賑資各穀二萬三千四百九十三石九斗五升零忠清
道畢賑狀啓各邑營鎮驛饑民五十八萬四千九百八十三口賑資各穀折租
七萬二千二百五十三石十四斗六升零米二千七百四十五石各人補賑錢五
萬四千兩零○己巳○庚午上御熙政堂引見大臣備局堂上右議政李止淵

啓言嶺南三倉漕船合十四隻及湖南執籌船四隻與載之報次第而至此乃嶺漕設置後初有之事依正廟甲寅年例監色沙格等令湖南道臣鈞問馳啓領運各差負及護送地方守令邊將等當自該曹該廳回啓請勘始終失飭之嶺湖道臣並重推而當此經費罔涯之時又有此狼狽如不量入而為出則一年支計萬無其策應天弭災之實竊有望於躬先節儉矣大王大妃教曰近來稅船致敗之報比多於前或值恠兩獐風蒼黃中狼狽無恠其然而許多奸弊無所不有乃至於年增歲加民間粒粒辛苦之膏血作為渠輩消澌之資今番許多船致敗非謂奸情之必有而此若不嚴加處置來頭之憂不知何屈躬先節儉之論所陳甚好今日實對進定專為講確此事也大臣與戶惠堂爛商節省之方條列以入則雖至難之事予當不靳聽施須深思好策以為對揚之地戶曹判書李紀淵啓言標紙別入即我祖宗故規之未有者也四五年来各種別入略綽計折殆近二十萬緡此固屢經大禮不得不然而較看已往即係初有且以紙地席子等物種言之目下會計非無遺在一經勅行與別使則今之遺在後必加下此不可謂遺在取用無關經費也明矣目下雖有裁省之舉若使別用猶復如前則烏在其節省之意乎此等處若蒙洞然照燭終始留心則

民國慶幸矣大王大妃曰以標紙別入或因有不得已之事而從今以往自內
當各別節省自外如有難處之事一並草記外此益加裁省俾為牽補之道宣
惠堂上趙寅永啓言各道災拯數近十萬結內而京貢價外而營邑需之分數
裁減自是法例而至於昨年則災結為八萬六千九百餘結故外道則雖為減
分京貢則不為舉論矣見今運船臭載至為十八隻而其中本廳納穀物都數
一萬三千餘石矣自今年七月至明年四月京貢價十分一減分磨鍊以為支
調之地大王大妃教曰特以十五分一減分施行○以成遂默為成均館大司
成○辛未○壬申大王大妃教曰今番許多拯米將為湖南沿民難言之樊三
漕倉兩處臭載十四隻拯米太特依壬子年例從民願發賣以錢上送切勿分
給民間事廟堂星火知委○癸酉○甲戌誅邪學罪人李光烈金女長金等八
人○乙亥太白晝見○大王大妃教曰今番稅船臭載歷日思之驚歎未己貢
價減分已出於萬不得已而自上亦不可不先有示意之舉自來朔至明年四
月各殿所入草注紙特為減半俾一分有裨於經用○以金煥為右邊捕盜大
將○命關東補參庫錢未捧七千六百兩特為蕩減○丙子○丁丑○戊寅○
己卯○庚辰○辛巳以李景在為吏曹參判李若愚為司憲府大司憲金遇明

為司諫院大司諫○壬午○癸未○甲申上御熙政堂引見大臣備局堂上○

乙酉○丙戌召見江原監司李光正于熙政堂辭陞也○判下戶惠廳裁省別

單宣惠廳畿營儲置減分錢二千五百兩本通儲置裁減還寢事既因備局回

下今無可銷到為嫌此則依法例當為減分上下內閣乙亥加劃錢一千兩

內五百兩量減內需司藥材價米一千石內限三百石量減本以壯營支放

以辛酉奴牌買給代屬于本廳矣今屬內司摠戎廳月課價米九百九十石內

一百石限十年權減訓局火藥價米四百石禁衛營火藥價米三百四十石御

營廳火藥價米三百四十石已上間年上下者而折半限十年權減訓局兼料

米七千二百石內二百石權減以原價送之牙山漕船限二隻權減每隻米七十六

石廳內公用量宜裁減○戶曹各官房免稅已輸送條外自今六月至明年新

捧依判下定式十五分一除留次捧甘京貢減分時例內需司移送址關州倉

入上給代米一千二百四十石內春夏等條已為輸送自今年秋冬等至明年春

等代錢輸送設司事勢如甚難則教曰依前輸送訓局兼料米一千七百四十

石中量宜除留使行時賜米代錢上下明禮官輸送錢一千八百兩慶壽官輸

送錢一千五百兩已上還寢教以慶壽宮五百兩輸送尚方燕貿各種價依已

已甲戌年例停止內需司移送鐵物自今年六月至明年四月不為輸送曹內
公用量宜裁減○召見忠清左道暗行御史任百經于熙政堂罪清安縣監李
繼在木川縣監李寅永忠州牧使申在翼全義縣監李義延清風府使朴宗琬
槐山郡守金炳斗溫陽郡守成憲曾青山縣監李龍在牙山縣監鄭祉榮延豐
縣監李象信新昌縣監李昂考栗峯察訪朴皓壽等有差因御史書啓也○丁
亥○戊子○己丑召見京畿暗行御史洪永圭于熙政堂罪振威縣令朴長馥
楊剛前牧使閔永勳坡州前牧使閔哲南陽前府使崔弘德長湍前後府使李
玄大金晉淵富平府使曹錫玄陰竹縣監李亮祚仁川府使李衡遠安城前郡
守李容在陽城前縣監朴來亨南陽府使崔漢翼等有差因御史書啓也○命
湖西公賑邑自備穀守令等施賞○庚寅以金弘根為司憲府大司憲○召見
忠清右道暗行御史趙徽林于熙政堂罪青陽前縣監沈遠悅舒川前郡守朴
萊壽唐津縣監金大淵洪州前牧使金鏞公州前判官李鼎耆瑞山郡守宋在
誼沔川前郡守金益根大興前縣監閔洙龍庇仁前縣監李復鉉保寧縣監李
義益魯城縣監徐光奎等有差因御史書啓也○辛卯○壬辰召見前江原監
司洪穉圭于熙政堂遞來也○癸巳罪忠清前前水使柳文儉水虞候李義儉

等有差因御史書啓也○都政下批以朴永元為工曹判書李翊會為司憲府大司憲朴宗吉為司諫院大司諫○七月甲午召見守令邊將初任人于熙政堂○以金煥為平安道兵馬節度使具信喜為左邊捕盜大將○乙未○丙申○丁酉○戊戌○己亥以金左根為吏曹參議○庚子○辛丑○壬寅○癸卯○甲辰以趙秉鉉為兵曹判書○乙巳備邊司啓言即見京畿暗行御史洪永圭別單則其一本道軍政事也近來民少役繁虛名勒徵疊庖轉成切骨之瘼豈民撻比前日減役名視古歲增而然也特冒頓多歧查櫛失要遂使幾輔根本之地民不堪命無一完處若先自巡營另汰營屬之諸般保率移充元額仍令各邑取校院額外各廳募屬各里楔房墓村投托一一括出則充額填闕不患不足其一巡雇兩庫還耗之以租折米每石五兩各項耗作之際將此混加換作加減一事亟行釐改事也五兩定價者似必較計支放之數而然而至於各項還耗之費緣混作難保必無道臣嚴加察飭其一還逋事也逋吏之不惟不嚴繩而知戢或諉以推剝無奈甚至填差任窠作為完逋之妙方如是而吏何所憚法將安施關飭列邑詳查釋簿摘發逋魁指名報營自巡營又即登聞以為依法勘斷之地其一畿甸驛獎事也今此五條中使客之濫騎也營屬之

冒騎也位土之賣買也此皆有開邦禁到底禁戢隨現嚴懲所謂京雇馬之為
獎於各驛極係可駭劃即查擲一並澄汰至於兩項錢之自巡營主管似或有
不得不然之端此則仍改之間從便釐正其一喬桐軍額虛錄事也把搃與別
軍官皆有勤仕履歷然後始許陞差仍定額數則可無如前混冒之弊而虛伍
充定亦將漸次就完依繡單使之量宜施行權罷陸軍加作軍官事揆以事理
似涉罣碍且係軍制有難遽議變通置之又啓言即見忠清左道暗行御史任
百經別單則其一熬丁之苦由於失丁其中作米軍每名納米六斗並計雜費
將近十斗其為哀矜有倍他役至於清州軍額大半虛名至有昨年斂戶之舉
依忠州已例特許代錢上納事也清州保米代錢事繡單所論雖援忠州已行
之例而更為許施則列邑俸望將無已時置之其一堤川軍錢以結布變通事
也軍錢輸納其法甚重雖有許多之弊此欲矯揀當以查正充伍為本結布一
款大是經法之外該繡衣不可無警重推其一永春丹陽黃磧等三邑火田結
搃事也初無加減每結價七兩有若分排斂戶自今以後毋論公私屯稅一依
時起從實執搃其一癸巳隱結查起丙申還陳之後木川清安全義或補公用
或藉私用青山牙山天安歸於揀獎有欠核實之政六邑在結使之一一俵給

民間事也前後道臣或為查起或請還給經權之間各有意見而或憑藉補獎或混歸私用該守令則繡啓皆已論列兩六邑在結準數出給以為湖民終始之澤並允之○丙午以權大肯為司諫院大司諫○備邊司啓言即見忠清右道暗行御史趙徽林別單則其一牛禁蕩然專在罰輕自今凡有犯屠勿許納贖必準徒限遇赦毋得輕放事也禁屠一欵既有筵奏行會及籌關別飭更當別歧廉探如或如前冒犯道臣守令將有論責更以繡單辭意申明分付其一邪學蔓延申明五家作統之法嚴立並坐之律事也本道素稱士大夫之莫比數敗彛倫之說豈或行之而若其蠢蠢下愚惑其妖法不無駸駸之慮矣燎原之勢早宜撲滅五家作統之法不告並坐之律更加申明期於剗殄無遺並允之○丁未○戊申○己酉以權敦仁為吏曹判書李義準為禮曹判書○庚戌以閔致文為吏曹參議○辛亥○壬子○癸丑○甲寅大王大妃教曰今見畿伯狀啓揚州牧使罷黜未知何事而不過是殘獎之局於心厭薄而然似此無嚴駭妄之習不可任置揚州牧使尹義倫即其地定配勿揀赦典雖以畿伯言之不能嚴飭一守令畢竟從其所願寧有如許事體監司重推又教曰更思之尹義倫之即其地定配不足為罰以遠配舉行○乙卯○丙辰○丁巳設七夕

製于泮宮○戊午上御熙政堂引見大臣備局堂上右議政李止淵啓言昨冬
以使行時珍玩雜物禁斷之意伏承慈教諄複可以痛革舊習而近以邪類現
捉者觀之燕本書冊元有禁制而邊禁不嚴以致妖書之尋常流出自今曆行
為凡係稗說雜書一切不得帶來之意添入於禁物節目而犯者直於境上
用律何如大王大妃教曰邊禁有國之大政常時不嚴已極寒心而今當無前
變惟之後上下若無所警動一向疎虞則其可曰有國有政乎昨冬新禁乃為
先事之慮而更為嚴立科條如有犯者一切以法從事邪書邪具皆從書冊雜
物中混同流出來者雜書雜貨若不出來邪徒雖欲購來其可得乎使之到底
搜驗毋得一種潛越之弊○己未進講于熙政堂○誅邪學罪人朴厚載李女
連熙等六人○庚申進講于熙政堂○注薦李寅夔鄭基世徐相教金益文沈
敬澤李玄文以上取六人○辛酉進講于熙政堂○壬戌進講于熙政堂○癸
亥進講于熙政堂○黃海監司趙斗淳以平山等十三邑人物滄死四十九名
民家漂頹一千八百三十五戶免山縣人物滄死五十名民家漂頹二百餘戶
啓○八月甲子日有食之○進講于熙政堂○備局啓言文東堂初試既用甲
午己例武科試取亦宜遵用請知委諸道令道帥臣合設免之○乙丑進講于

熙政堂○以宋啓榦為司憲府大司憲○丙寅進講于熙政堂○平安監司金蘭淳以平壤等邑民家漂頽一千五百六十三戶人物淪死二名啓○丁卯進講于熙政堂○慶高監司金道喜以昌原等邑民家漂頽三千一百八十八戶人命淪壓死五十四名啓○戊辰進講于熙政堂○己巳進講于熙政堂○庚午進講于熙政堂○命西洋漢范世亨等設鞫嚴覈○辛未進講于熙政堂○壬申進講于熙政堂○太學居齋儒生以西洋漢事捲堂陳所懷命曉諭還入○癸酉以朴晦壽為刑曹判書○上護軍徐有槩再疏乞休致許之○甲戌上詣太廟景慕宮展謁秋謁也○以朴綺壽為刑曹判書○乙亥進講于熙政堂○以金私根為漢城府判尹仇有祖為忠清道水軍節度使○咸鏡監司朴岐壽為咸興等邑民家全頽三百三十五戶啓○丙子進講于熙政堂○以李憲璋為刑曹判書○丁丑進講于熙政堂○鞫西洋人范世亨羅伯多祿鄭牙各伯及丁夏祥劉進吉誅之夏祥辛酉邪獄正法若鍾子也以洋術為家計與進吉趙信詰綢繆邀洋漢來為神父教主又裝送金雀二童於洋中期盡得其術進吉舌官也信詰徒隸也○戊寅進講于熙政堂○己卯進講于熙政堂召見奉朝賀徐有槩○庚辰進講于熙政堂○辛巳進講于熙政堂○壬午進講于熙政

堂○誅邪學罪人南履灌金濟俊趙信詰全女敬俠等九人濟俊盡于邪術與
崔京煥各裝送其子於洋中者也○梟朴春成鄭寬圭首於開城府以凶言不
道也○癸未進講于熙政堂○甲申進講于熙政堂○乙酉○丙戌○丁亥○
戊子○己丑○庚寅以任聖臯為左邊捕盜大將○辛卯○壬辰○九月癸巳
設九日製于泮宮○忠清監司趙冀永以公州等邑民家類壓四百八十九戶
人命滄壓死十名啓○甲午○乙未○丙申一兩試官金學性疏請冒赴入格
人慎弼欽拔榜刑配從之弼欽己丑伏法宜學從子也○丁酉○戊戌○己亥
以金景善為成均館大司成○庚子備局啓言漢城試二所出榜前已多囂聒
儒生之呼唱投石衛軍之潛入偷券可知科場之雜亂監試二所諸試官並施
以譴削之典允之○辛丑○壬寅修撰李正履疏略曰向者儒學之選即是當
時之考造士林之標準允合羽儀王朝出入講筵臣竊又念士之幼學壯行各
有蘊抱經濟百無一試者莫今時若也目今吏塗淆雜民憂頽洞移風善俗正
亦其時凡係才學掄薦之士勿拘資格畀以字牧之任使盡報答之責批以所
陳甚好當體念○癸卯○甲辰○乙巳○丙午○丁未○戊申以趙鶴年為吏
曹參議○己酉以李嘉愚為刑曹判書○庚戌以洪敬謨為刑曹判書○辛亥

○壬子○癸丑○甲寅○乙卯○丙辰○丁巳上御仁政殿行秋到記講居首
尹致賢製述賦居首睦仁哉並直赴殿試○戊午進講于熙政堂○己未進講
于熙政堂○庚申畫講于熙政堂○辛酉進講于熙政堂○壬戌上御熙政堂
引見大臣備局堂上大王大妃教曰內農圃屬之頃下身役曾有受教而該牧
使無難侵役至有御書閣前結縛之舉聞甚驚恠矣右議政李止淵啓言其間
口傳下教臣亦承聞而都由於中官輩導達之爽實其無嚴之習尤可駭痛矣
此輩許結役之未捧者聞為數千兩零屢度督促至於發差而厥漢輩頑拒不
納甚至於毆打官差之狀果的實云矣大王大妃教曰內司所屬亦入其中乎
止淵曰農圃所屬似統稱而言矣今年綿歉近年中最甚大同代錢或有自下
仰請之時而多致晚時實惠不究之患今則恩自上出前期頒令在灾民可謂
河海之澤而亦可無中間奸弊矣止淵又啓言今年畿內田農全無所收無論
尤甚之次旱田所納大同米許令詳定代錢則民可紓力故敢達矣大王大妃
教以苟利於民何惜之有况有先朝壬辰已例特為許施因此思之三南綿歉
無異於畿內田農亦不可無特施之典大同本無論三等邑並以折半代錢上
納事分付大王大妃命洋漢潛越時灣尹朴來謙李祖榮謹削仍飭五家統糾

察邪學止淵又啓言平澤故士人權璋卽故忠臣順長之玄孫而往在壬子以
邑倅承薰恣唱邪教不拜聖廟之罪移通太學嚴辭痛斥朝廷遣御史按覈其
時御史以承薰姻黨受囑搆罪卽地打殺滅口邑人至今扼腕今當邪孽復熾
民志靡定之時如此人合有褒嘉扶植之道故敢達矣大王大妃教以所奏好
矣分付銓曹以相當職褒贈○書講于熙政堂○十月癸亥進講于熙政堂○
甲子書講于熙政堂○吏曹判書權敦仁上疏曰臣以前兵曹叅判蔭宰末
擬事有大僚問備之舉蔭宰之不許騎曹臣未見有金石之載本曹掌攷以蔭
宰而前後為騎曹者非一二數今此望筒付標已蒙允俞而既不見確典區區
猶性亦難刺謬乃使成命稽滯尤增死罪乞逖臣本兼職名批以大臣所奏官
箴也卿言亦似有據何必深引乎卿其勿辭調理行公○乙丑進講于熙政堂
○右議政李止淵劄略曰臣伏見吏判疏本下者雖以蔭宰之不許兵叅無法
典所載為言其許擬獨有載於法典乎若以法文中諸曹佐貳之無所限別為
準則吏禮曹亦將以儒賢外凡蔭宰通擬乎銓家古規雖於典不載而只以例
為拘者難以僂舉則臣未知此銓長何所確執如是實言乎至於付標之不為
舉行尤是前所未聞之事緣臣見輕致使成命寢却不行者尤為臣難贊之罪

乞賜遽斥批曰吏判以掌攷為言故認以有據卿劄今又如此朝廷上相可否不害為美事而須有一番定式然後可無疑眩今番則改付標施行此後則勿拘通擬可也而如此微細之事至於深引萬萬過矣卿其安心勿辭○丙寅畫講于熙政堂○丁卯大王大妃命斥邪學繪音令內閣撰進○進講于熙政堂○戊辰畫講于熙政堂○以朴容壽為吏曹參議○己巳進講于熙政堂○庚午畫講于熙政堂○以宋冕載為吏曹判書○辛未進講于熙政堂○壬申畫講于熙政堂○高陽人金命吉以蓋草載牛曉到西小門外有一漢要路願買有一漢旁促之先牽其牛而去一漢拉牛主入酒家饋以飴糖與訖遂殞絕蓋置毒於糖也當部及京兆兩檢服毒實因同命要路人金振成取招結案旁促人金允吉次律施行○癸酉進講于熙政堂○甲戌畫講于熙政堂○乙亥進講于熙政堂○以李圭枋為成均館大司成○丙子畫講于熙政堂○丁丑進講于熙政堂○戊寅畫講于熙政堂○己卯進講于熙政堂○庚辰下斥邪繪音于京外曰嗚呼中庸曰天命之謂性尚書曰惟皇上帝降衷于下民若有恒性其論一原畀賦之初曰天曰上帝者天以形體言上帝以主宰言也曰命曰降衷者非諄諄然真有詔告也一理所發二氣斡焉四序所運萬品育焉人得

之為性者其德有四曰仁義禮智也其倫有五曰父子君臣夫婦長幼朋友也此皆當然而然無待乎安排布置勉強作為故曰天生烝民有物有則率之則為順天悖之則為逆天凡所以奉天而事上帝者豈有出於四端五倫之外哉嗚呼粵自羲農堯舜繼天立極其寅畏而祗承惇叙而敬敷者惟此而已亦粵我夫子祖述憲章之後至于有宋羣賢其明天理淑人心者惟此而已竊釐有差猶謂之異端况乎陰沴荒誕恠詭不經之外道乎國有常刑必殺無赦此所謂辟以止辟也嗚呼我東處文明之鄉襲仁賢之化美風善教厥惟久矣洪惟我聖朝受天明命肇造區宇明彞倫以立人紀崇道學以正國俗聖子神孫儆戒不怠丕克對越于天而休運永孚儒賢輩出上自公卿大夫下逮閭巷匹庶戶服洙泗之行家誦洛閩之書男以忠孝為本女以貞烈為重冠昏喪祭必遵乎禮士農工商各遂其業式至今胥宦以生國家賴焉矧惟我正宗大王挺天縱之聖紹百王之統聲明文物粲然具備而不幸有凶賊承薰者購來西洋之書號為天主之學非先王之法言而潛相誑誘非聖人之正道而馴致耽惑駸駸然入於夷狄禽獸之域於是乎正廟憂其久而愈熾也治其魁宥其餘克推欲生之念俾開自新之路恩莫厚矣德莫盛矣雖豚魚之頑梟獍之凶亦當有

所感悟而本性既喪舊習不悛以至辛酉討邪之獄而極矣其薄有才藝者艷其新而倡之矇無知覺者樂其誕而從之身處卿宰自作窩窟家傳詩禮亦有深汚而又謨則變難制敢行都市嗣永則裁帛書欲招海船凶圖逆節於斯為急苟非我純宗大王暨我貞純大妃悉燭魑魅之奸大振斧鉞之威廓闢而痛鋤之則國之為國人之為人未有未可知也嗚呼今距辛酉四十年所禁網寢疏邪教又盛虺蜮匿影稂莠易種逆豎變姓而出沒妖譚齋貨而交通潛募洋人至於再三而聲氣接於異域脉絡過於同黨比諸辛酉殆有浮焉肆予小子謹遵皇祖之謨恭奉慈聖之命不敢不行天之罰雖其迷昏而莫之返淪沒而莫之拯駢首連肩自底大戮而予惟為民父母其能無哀痛惻怛之心戚戚于中哉嗚呼子聞不教而刑謂之殃民予當以邪教源委逐條卞折用播告于爾在廷臣隣及我八方士女俾各曉然爾尚欽哉嗚呼彼為天主之學者曰是學也乃敬天也尊天也天固可敬可尊而彼所以敬且尊者不過如滌罪邀寵之諸鄙事自歸於慢天褻天也吾所以敬且尊者即向所謂四端五倫之昭天命順皇降而日用事為之當於理也邪正之分不待兩言且彼耶穌云者不知其是人是鬼是真是假而其徒之言以為始以天主下降死復上作天主為萬物民

生之大父母天也者無聲無臭人也者有軀有殼斷不可相混而今以天謂之降而為人以人謂之上而為天是有何依佈可惑之端而若是之矯誣也爾試思之往古來今有是理耶嗚呼匪父何生匪母何育欲報之德昊天罔極而生民以來漸滅他不得之大本也彼乃以生我者為肉身父母天主者為靈魂父母親愛崇奉在於彼不在於此以自絕其父母是果血氣之倫所可忍乎祭祀之禮所以追遠報本而孝子之不忍死其親也神理人情不得不然而彼乃毀主廢祭謂死者不知苟如是也彼所謂靈魂又何所依靠首尾橫決不成倫脊虎狼惡獸也尚有父子之情豺獺微物也尚有祭祀之義則彼雖圓顧方趾曾以教皇教主作為稱號不啻如戎狄之首長賊盜之渠率是欲攘司牧之權使政化無所底命令無所施也禍首亂本孰有甚焉嗚呼有陰陽必有夫婦不易之理也彼乃以不嫁不娶妄托貞德其下焉者男女混處穢亂風教由前則人之類滅矣由後則人之倫瀆矣無父無君即至於此夫婦之際又何可論至若聖母神父領洗聖振等種種名色愈出愈幻要之為狐魔巫覡符水詛咒之惑世者也粗具見識寧或疑眩而最是天堂地獄之說易哄魚蠢然此釋氏之陳

腐也前人之辨已無餘蘊不足更事劈破而是會孰見而孰傳之也蔽一言曰
謊說也彼亦均受天賦并充人類而乃欲數棄五常滅絕三綱以求其身後之
福於恍惚茫昧之地者不亦惑之甚哉求福之道誠有之矣詩曰永言配命自
求多福又曰豈弟君子求福不回配命者合於理也不回者不為回邪之行以
要之也如是則福自至不如是則欲求福而反取禍也予聞耶蘇凶死之寂酷
者也其學之為福為禍於此可驗而不惟不為之視以為懲乃以刑死為樂地
刀鋸桁楊皆不知畏如醉如顛莫可提醒非愚則妄吁可哀矣嗚呼此若為光
明正大之教則何必講授於昏夜密室之中彌聚於深山窮谷之間而廢種蠲
孽失志怨國之徒下流至愚騙財誨淫之輩互稱教友各設邪說藏頭隱尾打
成一片也哉即此形跡已判其至凶至妖而究竟為計不出於黃巾白蓮之包
蓄耳彼豈非生長於此邦食息於此邦者乎此邦之俗只是四端之擴充五倫
之培植而父祖之所相沿師友之所相資皆在於是則何故捨此邦所共由之
坦路甘心於幾萬里外異類之邪說以自就罟獲乎嗚呼彼浸漬之深錮者盤
叢之畢露者固已成伏厥辜而其未及現發者又不知糾結如何滋蔓如何死
者雖不足恤生者猶可丕變彼皆吾赤子耳忍使之一向沈盡不思所以牖昏

嚮明之方乎今子敷示心腹非子言也乃惟天之經人之維古昔羣聖之訓也嗟爾臣黎欽哉欽哉父詔其子兄詔其弟其所訛誤者必思所以開導焉其未陷溺者必思所以勸戒焉又或有開導勸戒而終不率者必思所以殄殪而懲創焉俾此一種毋敢更容則豈不休哉豈不休哉孟子曰經正則庶民興庶民興斯無邪慝矣為今之道其惟敦行誼以修其孝悌忠信篤經術以習其詩書易禮而勿以趨尚放縱背前聖之規矩勿以考據細瑣侮先賢之訓詁使我章甫衿紳粹然一出於天德天彝自然之則則吾道不期扶而扶異學不期斥而斥彼感發而自奮警惕而自悔者庸詎無去邪歸正之理哉嗚呼書不云乎百姓有過在子一人今茲邪教之橫肆職由子寡昧不能導率之咎反躬自責若恫在己而戴念爾一寒一煖一飢一飽之節罔非子小子夙宵憧憧則其於爾性命之所關係倫彛之所維持為人為獸之所界限剖判者子又安得不重言復言哀痛而諭之也

檢校提學
趙寅永製

○壬午書講于熙政堂○癸未進講于熙政堂○右議政李止淵陳疏辭相職許之

○大王大妃命知事趙寅永拜相○甲申書講于熙政堂○以洪稹圭為吏曹參判○乙酉書講于熙政堂○丙戌召見冬至三使臣于熙政堂

正使李嘉應
副使李魯乘

李正履

官辭陞也

○丁亥以金英淳為忠清道觀察使金大根為成均館大司成
○戊子教曰聞別軍職金見臣身死念其軍功不勝惻然客地治喪遠道運柩
不可不念自戶曹錢木量宜賻助○己丑○庚寅晝講于熙政堂○辛卯○壬
辰○十一月癸巳○甲午○乙未○丙申○丁酉○戊戌○己亥○庚子○辛
丑○壬寅上御熙政堂引見大臣備局堂上右議政趙寅永啓言臣於向者斥
邪論音撰進時以明正學為闢異端之本者此如中州盛則戎羯不敢侮元氣
實則疾疢不能侵也至於表章先賢風勵人士之方實為此時之先務各道書
院中如關西之仁賢海西之紹賢松京之崧陽畿輔之道峯湖南之竹林嶺南
之王山陶山湖西之華陽黔潭諸處皆係道統殿享而我聖上御極後未遑致
意之地也今若有一例循典則足可補崇儒之治示尚德之義而臣又有因言
端繼陳者前此經行別薦固已多得其人而山澤林樊之間或有守善而見漏
則恐非野無遺賢之道也且明春為式年應薦之時另飭各道益加搜訪必以
篤學力行之士從實入薦而有其人則不必拘於多寡無其人則又不可苟然
充數要之務得其人以為次次試用之道似好故敢達矣大王大妃教以正學
明然後邪教可闢書院致脩之舉從速舉行經行別薦之奏亦甚好依此為之

○召對于熙政堂○癸卯○甲辰○乙巳○丙午○丁未上御熙政堂引見大臣備局堂上右議政趙寅永以四條陳勉曰愛親曰法祖曰敬天曰恤民大王大妃嘉納命王堂官騰納一通寅永又啓言譏訶之方雖平常無事之時不宜放過况如此歉年乎此荒政十二戡盜居一者也另加提飭刻日督捕而此亦由巡綽不嚴坐更不明之致並為分付於各營各部一遵舊規舉行從之寅永又啓言法講之宗臣入參自是古規而近日專事懸頓喉院亦不察飭此後則申飭輪進無或闕參從之○戊申○己酉○庚戌○辛亥畫講于熙政堂○壬子○癸丑畫講于熙政堂○甲寅○乙卯畫講于熙政堂○以李寅臯為吏曹參議○丙辰誅邪學罪人崔昌洽丁女情惠等七人○給衣簿軍兵及流丐恤典○丁巳○戊午以朴綺壽為漢城府判尹○己未○庚申○辛酉畫講于熙政堂○壬戌設柑製于泮宮賦居首趙鳳夏直赴殿試○十二月癸亥○甲子○乙丑○丙寅○丁卯○戊辰○己巳○庚午命北兵使李存敬拿處以都試雜亂也○辛未以尹禹鉉為咸鏡北道兵馬水軍節度使○壬申上御熙政堂引見大臣備局堂上右議政趙寅永啓言蔭武前衛一斥不復其中最可矜者即未經外職在任遭喪之叅上與初仕耳自今每都政吏兵曹各以叅上一窠

初任一窠作為在任遭喪者懸注揀擬之地從之寅永請申嚴屠牛之禁大王
大妃教曰牛禁本是國典近來蕩然實為可悶雖不藏牌多有歲時潛屠之弊
故或有不得不藏牌之時矣事關農作以此預加申飭無或如前泛忽○大王
大妃命故察判柳畊錦陽君朴齊聞妻林氏施旌閭之典畊以孝林氏以烈也
○癸酉○甲戌召見忠清監司金英淳于熙政堂辭陞也大王大妃教曰本道
今年農形比兩西雖云稍勝而亦未免歉荒民情實為矜悶矣卿必詳聞列邑
之事下去後須思懷保莫接之策○乙亥○丙子○丁丑命景慕宮入直官朴
孝聞守門將李麟九拿處當夜四更本宮奉安閣燼各室御真移奉於移安廳
大王大妃教曰常時不飭之景慕宮提調金履載施以罷職之典○戊寅○己
卯○庚辰○辛巳○壬午○癸未○甲申都政下批以李翊會為司憲府大司
憲尹命圭為司諫院大司諫○乙酉召見守令邊將初仕人于熙政堂○大王
大妃教曰兩西年形之歉荒已聞之而近來所聞尤為違急賑政何以經紀而
實為憧憧寢食靡甘特下內帑銀一千五百兩丹木二千斤白礬二千斤自廟
堂量宜分送○丙戌上詣景慕宮展拜○丁亥○戊子命平壤人權處祐施以
暴屍律處祐狂易乘醉執其母旋自斃也○己丑獻納任百能疏略曰今茲吏

判事有不勝慨惋者被以白首垂死之年承此委毗之眷罔念物情之不叶竟
乃洩忍而躡冒大政纔過聽聞益駭悖予之操縱納賂妖妾之愆患暗囑傳說
聒聒衆口莫掩臣謂吏曹判書宋冕載施以譴罷之典斷不可已也批曰爾言
得無過乎勿辭察職○以金弘根為吏曹判書○庚寅誅邪學罪人洪永周等
三人○辛卯京兆獻民數五部及八道都元戶一百五十七萬五千八百二十
四戶男三百三十四萬七千五百三十三口女三百三十四萬五千四百七十
三口是歲京畿湖西關東北饑海西關西大無

憲宗經文緯武明仁哲孝大王實錄卷之六

(B)
732.55
4724
[v.28]
no.3
0230296

昭和七年七月十五日印刷
昭和七年七月二十日發行

(景李朝實錄太白山本)

京城帝國大學法文學部

京城府蓬萊町三丁目六十二番地

印刷所 朝鮮印刷株式會社

(B)
732.55
4724
[v.28]
no.3